

Indexering lo bay cu forza retroactivo te 1 Januari 1998

ORANJESTAD(AAN) -- Na momento cu tuma un decision riba indexering di salario di empleadonan publico, esaki lo bay cu forza retroactivo te cu promer di Januari 1998. Esaki ta loke DIARIO por a compronde for di fuentenan di gobierno. E momento di tuma decision riba e indexering pa e aña aki ta depende di e momento cu tin un gobierno nobo. Di acuerdo cu e responsabilidadnan limita di un gobierno demisionario, esaki no por tuma decision riba asuntonan cu ta regarda e gobierno nobo. E actual gobierno ta teniendo su mes estrictamente na esaki, contrario na pasado caminda e gobierno demisionario tabata tuma un cantidad di decision cu despues a costa pueblo masha hopi placa. Caminda a tuma decisionnan di nombra hende den posicionnan hasta cu nan no merece y contra reglanan di mancho personal. E gobierno actual a dicidi di no

haci nada di e indole aki y a pone tur cos "on hold". Esaki ta conta tambe pa e asunto di indexering.

DELIBERACIONNAN

Di acuerdo cu veredicto di Juez, gobierno a sinta na mesa siman pasa cu sindicato SEPA pa sigui cu e deliberacionnan riba indexering. DIARIO a compronde cu e deliberacionnan lo sigui pronto cu tur e otro sindicatonan cu ta representa un of otro grupo di empleado publico. Pero e decision riba e altura di pago di indexering ta uno cu e gobierno nobo lo mester tuma na momento cu esaki asumi responsabilidad. Na momento cu e decision aki tuma lugar e pago lo bay hek te cu promer di Januari 1998, manera semper ta e caso. E deliberacionnan cu tabata tuma lugar aña pasa na September a worde interumpi ora cu gobierno a baha. For di e momento ey gobierno a bira demisionario y no por a tuma e clase di decision aki mas. Den un carta na Gobernador

y gobierno, e lider di oposicion e tempo ey Nelson Oduber a pidi pa gobierno tene su mes na e reglanan di un gobierno demisionario y no haci ningun palabracion cu lo mara e gobierno nobo cu lo mester a sinta dia 13 di Januari 1998. E sentencia di Juez den e caso di SEPA contra gobierno caminda Juez ta ordena gobierno pa sigui delibera cu e sindicato, no a cambia nada den e situacion aki. Gobierno por delibera pero no por dicidi. E sindicato SIMAR a anuncia avor cu e tambe ta bay Juez pa exige pago entrante promer di Januari 1998. Den ausencia di un acuerdo riba indexering pa 1998 e exigencia aki ta parece irrasonabel y por ta hasta na desventaha di e sindicato. Ya cu cualkier acuerdo lo ta vigente entrante promer di Januari 1998, e exigencia di SIMAR ta parece superfluo. DIARIO no por a haya informacion di e dia cu e deliberacionnan entre gobierno y sindicatonan lo continua.

Agente policial di Canada di bishita na warda di polis Oranjestad



ORANJESTAD(AAN): Un homber kende ta na Aruba hunto cu su casa pa asina pasa vacation a haya bon di pasa na warda di polis na Oranjestad pa asina conoce polisnan local y tambe combersa cu un of otro polis un rato.

Aki ta trata di e homber Canades Ronald Rudy kende ta un agente policial na Canada.

E posicion cu e tin ta Constable y e ta pertenece na Tavistock Police Service di Ontario Canada.

Riba e foto por mira e momento cu el a bay pafor pa asina saca un foto hunto cu e agente policial primera clase Jairo Maduro para banda di e escudo di cuerpo policial di Aruba pa asina e hiba esaki como recuerdo pa su pais.

RECLAMO DI HABITANTENAN DI TANKI LEENDERT RIBA ELMAR

ORANJESTAD (AAN): Habitantenan di un bario den Tanki Leendert ta cuminsa ripara cu ultimamente trahadornan di NV Elmar no ta tuma e 'meterstand' como debe ser.

Un di e habitantenan a indica na DIARIO, cu el a ripara cu e persona di e compania di electricidad cu mester tuma e 'meterstand' na su cas, no ta ni stop pa haci tal. Pesey te cu awor su cobranza no ta cuadra cu loke su meterstand ta indica pafor.

DIARIO ta na altura, cu un ciudadano a haya diripiente un suma hopi abao di paga pa cuenta di coriente. Pero e siguiente luna: E cuenta a bin riba di 1.000 Florin! Anto esey pa un cas cu no tin unicamente 1 airco.

Pa tal motibo, nan ta suplica NV Elmar pa instrui nan trahadornan pa por fabor haci un mihor chequeo di e meterstand.

TA BENDE STEMPEL

